

石

匱

書

石匱書卷第四十

明蜀人張岱著

李岐陽世家

岐陽王李文忠者泗之盱眙人少名保兒父貞娶
高帝姊漁泗水上歲儉時有所助高帝久之高
帝姊率保兒方十二貞聞帝起淮右携之軍中見
帝帝見貞衣被褸裂問曰丈夫治生得無苦乎對曰
苦漁稅保兒牽帝衣帝喜且泣曰人言見舅如

見嫌信然遂賜以己姓名曰文忠與任文正同延師
誨之文忠恂恂若儒生而蹈厲奮揚胆氣雄邁就外
傳頗工詩詞 高帝取以示近臣曰平世一卿士也
今非其時要當於馬上習之丁酉年十九倂以舍人
領軍援池擊敗漢戎戎陞帳前親軍都指揮使率所
部下青陽石埭旌德敗元阿魯灰破苗獠於於潛昌
化獲婦女輜重甚多晝燔遣之厲士曰固不足惜擊
力殺賊何止是進次淳安夜襲洪元帥降衆千餘與

鄧愈胡大海會取嚴州周人率苗兵水陸至出奇大
破之積斬馘載竹筏乘流而下瀨以懾周人周軍皆
震拒却周軍烏龍嶺進取浦江訪求鄭義門避匿者
按堵之令士女得焚掠撫元降將員成蔣英劉震三
萬人於桐廬已亥與大海克諸暨禽人四千從間道
破周軍碧溪胥口使裨將何世明克分水斬首五百
級進擊之三溪斬首千餘遷同僉樞密院事守嚴辛
丑城嚴與胡大海援其子德濟廣信生禽漢將李明

道及宣慰王漢二釋二之俘使併降其兄建昌將溥
壬寅蔣英劉震叛金處文忠赴援賊委城道撫定其
人民遷浙東行省左丞開省金華總制衡處廣信嚴
諸全諸軍馬以虛聲破周圍諸全軍乃與胡琛還定
處英震走歸周癸卯自嚴馳拒叛將謝再興於義烏
築新城諸暨西以胡德濟守之拒却周將李伯昇兵
遷右丞乙巳伯昇復以二十萬來寇新城馳之未至
可十里止營龍潭德濟使人間道報曰敵衆姑俟大

軍文忠曰衆則彼也謀則我也畏衆益衆衆乃在敵
無衆不衆衆乃在我下令曰彼衆而置我寡而整伯
昇一戰可擒且聞彼輜重山積是天以富賜若曹也
衆咸奮戰既合文忠橫槊掠陣引鐵騎數十乘高馳
下直出賊陣斷其中堅賊列騎迎戰文忠手格殺數
十人左右迎擊所向披靡賊賊而奔自相蹂躪德濟
從城中亦鼓噪而出斬首數萬捷聞賜御衣名馬丙
午下浙江使朱亮祖耿天璧克桐廬袁洪孫虎下富

陽進克餘杭且入杭州是時張士誠改周為吳其將
潘原明惧遣方彛請降文忠曰師未及城員外約降
得毋緩我乎彛曰將軍之兵動如雷霆旌旗遙指莫
不震驚及聞布德勞來秋毫不犯乃始還靈定魄擇
託而歸豈有他意文忠見其誠引入卧内津遣之明
日原明封籍府庫軍餉并執劉震蔣英以降用女樂
導引入城文忠叱去之既入令諸軍皆止樓櫓上造
民居者斬一卒入借民舍立斬之台見諸元將悉送

高帝軍凡得兵三萬糧二十一萬馬六百足吳元年
詔曰甥文忠幼育帳下比於吾兒子馬文藝靡不閑
貫弱冠起軍中食院金華開省嚴陵平烏龍破苗獠
援諸全陷陣衝鋒如遇枯朽比者直搗臨安克其堅
城按堵如故朕自起淮右奄至江左同心一力諸勲
有之國戚蔑如惟爾文忠親則舅甥恩則父子謀畫
勞勩與諸勲並是用加爾崇祿大夫浙江行中書省
平章作鎮茲土復爾故姓爾其勗之洪武元年繼湯

和入關悉平諸山寨二年以偏將軍副常遇春帥師
十萬北征平定開平遇春在軍中承命領其衆率師
西與大將軍達攻慶陽至太原聞元將脫列伯孔興
政大同急文忠曰大同受敵燃眉之急若待進止其
烽益熾關外之事有利專之皆曰然遂繇代出雁門
次馬邑敗其邏騎數千擒元平章劉帖木兒至白楊
門擒其四大王且近敵壘天雨雪身引數騎察關近
山無有伏召諸軍阻水而屯其夜有黑雲壓營文忠

曰雲壓營主有賊劫者令馮宗異等伏八萬騎白楊
門別令二萬騎飽食無動夜半脫列伯果空壁來文
忠以二萬騎誘之皆殊死戰寅至辰度其飢疲分軍
左右翼自為先驅與宗異奮擊大破之脫列伯之部
將縛之降文忠手解縛延為上客元人降者皆喜孔
興部將聞脫列伯敗亦斬其首以獻進東勝州莽哥
倉不見虜還於是元主退保應昌 帝欲窮滅之絕
其南向意三年為征虜左副將軍與徐達復北出至

興和降其將進擒其平車竹負於察罕腦兒敗其太尉蠻子平車沙不丁朵兒只八刺於白海子之駱駝山進開平遂趨應昌未至百餘里知元主殂兼程進復遇元兵與戰大敗之追至應昌圍其城克之獲元嫡孫買的里八剌及后妃宮女諸王達官所藏歷代玉璽金寶圭冊斧元太子與數十騎遁率精騎追之至北慶州見角牴而還返過興州降江文清等三萬六千餘人至紅羅山又降楊思祖等萬六千餘人

班師還朝 上勞於郊其冬大封功臣 上曰李文

忠取應昌功最大封曹國公同知軍國事食祿三千

石四年西蜀平鎮成都五年以征虜左副將軍與徐

達馮勝率十五萬騎北伐分三道並進文忠總東道

與都督何文輝等出居庸橋應昌取和林進口溫河

至哈剌莽來虜遁文忠曰兵貴神速千里襲人柰何

多負載乃留輜重於盧朐河令士卒裹二十日糧倍

道至土剌河虜將哈剌悉渡河陣而待文忠戰數合

稍却進至阿魯渾河虜益衆搏戰馬中流矢徒步持
短兵接戰裨將劉義直前蔽之指揮李崇授以所乘
馬自奪虜騎乘之文忠策馬橫槊麾衆更進士皆殊
死聞獲虜人馬萬計追至駉海虜復合益生騎文忠
勒兵據險椎牛享士大縱所獲馬畜示虜平若虜遲
疑不敢近引軍還夜失道糧且盡士多渴死至哥兒
麻思所乘馬嘶而跪泉湧出刑牲祭之獲故元官屬
子孫及軍士家屬千八百四十餘人送京師是時文

忠父貞尚在 上即封為曹國公追封隴西公主為
曹國長公主貞為人醇謹 上燕見無時每有征伐
輒令守宮省而貞貴之後蠲河西數郡漢稅曰以駙
馬故也六年屯代出朔明年使諸將出代擒元平車
陳安禮木屑飛於三不刺斫元將珍珠驢於順寧陽
門擒太尉伯顏不花於朔俘元國公鄧孛羅帖木兒
於白登轉克大寧高州大石崖斬其宗王朶朶失里
擒承旨伯家奴遣裨將追斬元魯王於遁帽山獲其

妃略豐擒胡官十二人虜衆百二十馬駝牛羊萬計
十二年命督軍河岷臨鞏得便宜行事擒獲叛逃土
酋城洮守之其明年召還叅贊軍國事十六年使兼
領國子監事文忠器量沉宏人莫測其際臨陣遇敵
胆氣益壯故戰無不克及釋兵家居手不釋卷其館
中多文墨士文忠常以客所言言 上前上怒高麗
謂與惟庸通欲討之文忠諫又諫宦者太盛非天子
不近刑人之義 帝大怒曰此儒生家言何從出爾

口耶安所受之使人畫教其容文忠歸見館客橫屍
牖下病悸不治 帝為族誅諸醫及其侍婢六十許
人追封岐陽王謚武靖配享太廟二子長景隆嗣爵
次增枝景隆自有傳永樂國除嘉靖中繼六王後封
其八世孫性為臨淮侯

石匱書曰岐陽王不數為大將將輒有功敦詩悅禮
有儒者風斯所以肺腑哉 高帝起民間屢更燹饑
兄之子獨大都督文正姊之子獨岐陽王而大都督

不善居熱父子以廢徙而高帝念之不絕其國蓋
三百年而南面如故也臨淮之紹侯其亦高帝遺
意哉

石匱書卷第四十一

明蜀人張岱著

沐黔寧世家

黔寧王沐英定遠人故姓李又姓木乃姓沐也八歲
父母死帝得之民間時帝二十五未子與孝慈
皇后養為子姓之朱名之文英與懿文太子同食起
英溫爽有姿概機穎過人入侍帷幄晝夜勵勤目無
遷視帝深器之年十八授帳前都尉守京口擢廣

武衛親軍指揮使洪武元年以所部從取鉛山下崇安會湯和攻陳友定於延平取之其故將子隆負固不服英與裨將蔡玉夾攻生得子隆將谷保盡定閩地高帝曰母李爾李母朱我朱與之木姓而名曰英調守建寧節制邵延汀三衛三年授鎮國將軍兼大都督府事時天下兵樞務劇每辟畫具稱帝意孝慈皇后尤愛重英恒語帝曰是兒吾子孫屏翰也命兼傳錄陝右至興河甸宣德意有便宜以聞報

報可四年副征西將軍鄧愈征西戎渡黃河略烏思
藏耀兵至崑崙轉戰數千里俘馘以萬計師旋而鄧
愈道卒英代將其衆還京封西平侯洮州十八族番
酋三副使汪舒朵兒癭曩子烏都兒及阿卜商等雖
嘗遣子入侍而叛服不常命西平侯與都督僉事藍
玉等率河南陝西山西兵討之至朵甘降其萬戶迨
失迦突其部落進至洮追擊其十八族酋長職方其
地吐蕃川藏皆從風降城洮守之擊敗三副使衆并

擒瘦獐子封來獻殺獲數萬獲馬二萬牛羊十餘萬
諸將論功而侯者凡十一人居三年元故將脫火赤
及愛足屯和林擾邊命英討之英遣候騎偵知脫火
赤兵次亦集乃路遂踰賀蘭涉流沙七日夜至其境
夜去穹廬四十里斲枚四其軍自當前圍擒得其金
部以歸還鎮關中十四年與大將軍異道出古北口
克灰山嵩高全寧四部取元將宣於臆胸河俘口千
餘還京其秋穎川侯傅友德為征南將軍征雲南英

為副 高帝為英易木曰沐曰南方火也以其克之
勿用生之英至雲南元梁王將達里麻以壯兵十萬
拒曲靖英謂潁川侯曰彼謂我師罷於深入未有虞
心正可破也倍道進江霧不見人冒及於白石霧歛
達里麻見英軍江上大驚潁川侯欲濟英曰未可也
我軍遠來形勢既露固利在速戰然亟濟則所傷必
多宜多方以詭之乃整師臨流勢若欲濟達里麻果
擁精銳扼水上英別出一軍從上流潛渡出其後吹

角建幟達里麻軍皆亂英使輕猛善沒者先涉長刀
蒙盾斫其軍元人却數里趣師畢濟整之潁川侯進
戰數合英縱鐵騎入之連斬數十百人生捉達里麻
捕甲士二萬馬萬疋死者屬十里潁川侯與諸將分
兵進英從左副將軍藍玉趨雲南梁王入羅佐山自
縊死悉定雲南地徇建昌潑江臨安沅江尋甸楚雄
皆下之土酋段明據大理搃下關左副將軍玉使定
遠侯王弼繇河水東趨上關自率衆抵下關而使都

督胡海洋夜從間道出點蒼山後建志其上昧爽我
兵抵下關英騎涉河水齊馬腹斬關而入拔之還與
潁川侯合攻烏撒東川之復反者又東攻諸蠻之未
服聽者其諸蠻部雲南者乘英東復及英引兵還與
都督馮誠僉事謝熊剿殺之斬首六萬生捕四千皆
震服 高帝使傅友德班師而鎮英雲南英辦方物
揆貢賦瘥民數和力役疏其節目以簡易其人麓川
之外緬甸里之外八百媳婦皆內面十七年剪除廣

廣南維摩餘孽以通回州糧道巡撫旬安而還上
曰朕有英而無南顧憂英奏雲南地荒廣請令軍士
屯糧上嘉英如趙充國也於是葺壘城池設營堡
開屯田立傳置二十一年百夷思倫發降復叛入寇
馬郎他即旬之沙摩勒英遣都督寧正擊破之斬首
千五百餘級頃之思倫發復以三十萬衆象百餘大
寇定邊新附諸夷皆動英自將五萬討之選驍騎二
萬晝夜兼行旬有五日使馮誠挑以輕騎百餘百夷

以萬人驅象迎戰指揮張因以五十餘人射仆象追
殺其酋長大呼而入斬首數百級諸軍皆乘勝進英
使軍中列火銃神機矢為三行象來前矢發不退次
行發又不退三行發明且緬人悉驅象來背欄楠竹
簾鉤釘鐘鏃左右樵探英三其軍馮誠前甯正左湯
昭右下令曰聞砲聲齊戰捷一級一隊賞退一卒一
隊戮鼓之前行之矢發銃砲震動山谷中象皆挺透
決驟英軍坦呼而慶戰緬大紛拏戈甲慶摩飛塵塗

濺指揮張因與千戶張崇祖乘勝追之盡焚其寨昔
刺亦百夷之勇人也復來殊死戰英望見左隊少却
曰取其隊首來左師顧見與其衆死之大敗緬人斬
首三萬級俘萬人緬人戰則其渠率縛身坐象裹革
兜披鐵甲於是皆身中百餘矢殪象背上其衆連日
不得食死者相枕思倫發遁去英還師雲南所過城
邑爭持牛酒郊勞威名紛紜蠻夷中其負東川蠻復
叛上命穎國公仍為征南將軍英為左副將軍普

定侯陳桓為右副將軍討之諭其脇從越州酋阿資者先是其父龍海與廣西赤部酋者滿矣情通以叛英自將擣殺者滿矣情俘男女千馭畜產稱是龍海遂降徙之遼東至是阿資又叛英遣都督寧正從顯國公討之殺其黨火頭美宗等五十九人俘男女數百馭畜產千計阿資窘蹙與其母出降其冬入朝

上宴之奉天殿賜黃白二金若鈔綺甚厚造第鳳陽尋遣還鎮二十三年英使臨安衛指揮王執討平教

化三部之不賦者又使貴州都指揮張泰討普安南
密即之亂二十四年復征阿資叛詔平羌將軍何福
領西平侯兵而令西平侯還鎮阿資亦旋降英在鎮
一日立廳事前忽仆侍者掖之曰風入腑矣柰何他
事無所恨直上恩罔極不能報耳言已遂瞑初英
留鎮之二年哭孝慈皇后水漿不入口者三日斬哀
哀臨終三年喪每哭幾絕及今二十五年又哭懿文
太子哀毀逾禮因感疾遂卒年四十八贈黔寧王謚

昭靖脩享太廟還葬都門外雲南父老蠻夷酋長莫
不流涕請立廟制曰可英子四人春晟昂昕尚

成祖長公主春年十七從父征討有功平定江西山
寇先登授驃騎將軍都督府僉事從征虜將軍馮勝
出沙漠二十五年嗣父侯鎮雲南平緬東川維摩阿
的越雋賈哈刺等蠻加授征虜前將軍年三十六卒
建文帝謚之惠哀無子晟嗣晟少凝重端慤讀書敏
記高帝甚重之弱冠授都督僉事亡何進左都督

既嗣侯即代為雲南大帥時岷王國雲南與歲有隙
帝賜書王謂歲少不更事毋深責之吾當別飭歲然
率以王他故徙國楚而歲自如建文遜位去 文皇
疑匿歲所使使詞察無狀乃已麓川宣慰使不能制
下諸蠻逐之而擅其地歲以大兵討平之分其地為
孟春木邦孟密三府鎮沅威遠二州平涯潞江清甸
大侯者樂五長官司而歲徵其貢賦又於潞江之西
置騰衝千戶所以控之夷遂帖息八百國長使其獷

帥以蠻衆來犯晟發兵使別將逆擊而自將其後至
蒙自蠻退走追獲其帥賜璽書金幣永樂四年討安
南晟為征夷左副將軍率雲南諸衛所土漢兵隸蒙
自經野蒲斬木通道以入前鋒奪猛烈棚華關隘賊
散走造舟以濟師分遣所部據澳沕沙昇舟夜出洮
水步騎夾之遂渡富良江與征夷將軍新城侯張輔
兵合破多邦城柵繼擣其東西二都及盤灘困收櫓
江仙侶等賊悉蕩平之入朝論功封黔國公賜誥券

大宴 帝御製詩褒美之還鎮雲南亡何安南復反
命晟兼征夷將軍討之不利於是以英國公輔率兵
合而破之晟亦受賞有差尋奉詔撫富州叛酋降之
仁宗即位召還宴勞賜金幣加太傅正統間麓川思
任發反侵畧騰衝南甸詔諭之降不從晟使都督方
政等為前鋒而自率大軍繼之政恃勇以輕騎挑戰
敗死晟還鎮慚懼得疾至楚雄而卒詔為治塋賜祭
追封定遠王謚忠敬晟應變非所長其戰數不利而

天子以絕遠且世將籍而隱焉漢人懾服歲父子咸
信莊事之無異人主每片紙下土酋所具威儀出郭
迎迓盟而後啟曰此令肯也歲時奉獻不絕歲前後
置園墅田業三百六十曰吾日食其一可以周歲珍
寶金貝充牣庫藏後庭曳羅綺役使閹奴可數十百
人而善事中貴通遺執政不絕歲子斌幼不能蒞事
歲弟昂以都督代鎮昂卒斌嗣公十一年薨子琮方
襁褓從兄璘璠以才舉相繼代鎮凡十五年而琮始

嗣公又明年始佩征南將軍印為鎮守前後平馬隆
麗江劍川順寧羅雄等蠻累賜勅褒獎加太子太傅
凡三十二年而薨謚武僖琮無子以從兄瓚之孫崑
嗣朝議以崑為西平侯之裔孫當從侯爵而守臣爭
之謂南人知黔國公不知西平侯也侯之恐為所輕
崑年十四而拜公爵尋以征南將軍鎮守發兵平龜
山竹箐蠻諭定孟養孟密之爭寨者又平米魯亂擒
亂酋張良受那代三賜璽書獎諭凡二十四年卒贈

太師謚莊襄子紹勳嗣十六年而卒子朝輔嗣十一
年而卒二子融輩南襲皆殤朝輔弟朝弼當嗣虐其
嫂上疏相訐久之始得襲其淫惡益甚旅拒王命詔
削其爵以子昌祚嗣且代鎮而朝弼復欲殺其子逮
至京錮於南都之故第以幽死沐氏鎮雲南擬於親
王督撫大臣謁沐氏皆及門下車蒲臬以下逡逡為
讓天下久平縉紳士抑貶之萬曆中昌祚出僉事湯
寅秋不避道昌祚督其下人寅秋與昌祚訟於朝中

朝之士多不直昌祚而取詔旨切責之蓋沐氏鎮雲南其卒也皆還葬留都門外所以得用閹其始鎮太祖使閹監之陵夷用閹人

石匱書曰人言黔寧王為高帝外婦子非也帝長於英十五年當英之生帝方寡孤安從取外遇哉英以慎靜饒兵略為天子策路藍縷以開漠土晟武則不競而德繼之世保赤社為明藩屏夫豈一朝一夕之所致哉朝弼銅死昌祚嗣興法與恩不相

蔽明德義且遠矣

石匱書卷第四十三

明 蜀人張岱著

鄧寧河世家

寧河王鄧愈者虹人也生而魁偉有大志膂力過人
元末豪傑蜂起父順興起兵於鄉據臨濠與元兵戰
死之兄友隆代却未幾又死衆推愈復領軍事愈年
十六衆頗少之既出戰則先登陷陣無所不摧破衆
乃喜曰早得仲帥乃公何至亡居二年間 高帝駐

滁陽愈自盱眙率所部來附授軍總管從渡江克采石取太平元將陳瑋先蠻子海牙合兵數萬襲采石帝禦之戰甫合而愈與徐達率奇兵繞出其後大破之瑋瑋先蠻子海牙走遂定金陵拔溧水破鎮江愈皆與有功擢廣興翼元帥出守廣德州長鎗軍來寇愈出輕兵背城戰走之擒其總管武世傑俘馘千餘人擢判行樞密院移戍宣州尋取休寧績溪與胡大海合兵攻徽州元將敗走徽州下方繕城郭苗帥楊

完者率十餘萬衆來爭，愈勵將卒與越國公分道逆戰，大破之，虜其軍較百五十八人。苗師奔潰，婺裨帥汪同來降，愈令同為鄉導，遣驍將王弼、孫虎等襲破其城，殺守將帖木兒不花，獲級千五百，生降三千人。婺源下，尋遣朱國寶徇高河壘，亦下之。遂繇昱嶺關進攻建德，破其長鎗帥余子貞，獲馬百疋，追奔至淳安，大破之，獲戰艦三十卒，三千，遂克建德，以為嚴州。進同僉樞密院事，略臨安，大破敵於開林，移鎮饒州。

饒為偽漢所部初附未馴而濱彭蠡虜得以舟師出
沒傾我瑕隙愈謹斥堠津邏悉敵要領與院判于光
左丞余椿等連營扼塞敵至輒殲之除行省叅政總
各翼軍馬時境內弄兵者欲通潁尚首鼠兩端愈廣
布帝威德撫納降附于是浮梁樂平俱下駐平塘
勒兵取撫州撫州帥鄧克明畏愈強遣人詐獻地以
緩我師愈詞得之佯納其款即率勁兵間道夜馳二
百里黎明下其三門克明出不意單騎走偽邑自度

不免乃以分省印及所掠撫州等四路南豐等十八縣印詣愈降愈遂定撫州 帝進兵取洪都降其丞相胡廷瑞平章祝宗同僉康泰等召愈以步兵來會改江西行省恭政鎮之命祝宗康泰仍故官以所部屬愈宗泰初不欲降迫胡廷瑞意鞅鞅不自得又以愈秩卑不欲為之下廷瑞從 帝還建康途中為言降故非宗泰意恐有變時右丞徐達方進攻楚乃發使使宗泰以所部從舟次女兒港遂謀叛掠商舟布

為旗幟夜趣新城門舉礮破之愈聞變倉卒以數十
騎走賊邀之且戰且走從騎被殺盡愈窘甚連蹙三
馬馬輒蹶幾不免後得養子馬乘之乃得脫奪撫州
門而出犇還建康以情歸於帝帝勿罪也右丞達
復洪都走祝宗執康泰於是大都督文正開府洪都
愈次焉明年陳友諒傾國師圍洪都號五十萬治戰
艦高與城等文正約束將士登陴畫門而守愈得撫
州門最為衝要晝夜不解甲者三月會帝來援廩

戰鄱陽湖大破之射殺友諒圖解論功與克敵等尋
平新淦破鄧清於永豐及臨江十洞諸山寨遂圍贛
州韶雄以南俱降帝褒諭之晉右丞加平章政事
位次丞相愈年二十八從龍諸大將蚤貴無如愈與
李文忠者留鎮襄鄧其壘書曰古之良將仁義為先
勇略次之襄陽北控河洛西抵三巴新附之民未有
定志邊境不寧寔勞我心我之賴爾長城也爾能勉
為功名垂於竹帛朕亦無西顧之憂矣愈奉命益折

節下士所接引皆英髦簡重謙恭飲人以和而又器
量闊瑋沈毅不伐時方之羊叔子吳元年兼太子諭
德克征戎將軍取江淮未附州郡克唐州南陽生擒
蔡國公取隨州洪山砦夜斬關入討蜀河奔張獲之
商房以西悉定復副征虜大將軍破擴廓於定西招
降河州土番諸酋秦隴平於是朶甘烏斯藏等部落
皆來納款三年封衛國公與世券誥曰江海之淵神
龍居焉波濤洶湧莫測淺深以故神龍得運用其間

出而興雲代天澤物龍雞云神淵資之也朕起草萊
與群雄並驅獨居江左周回皆勅敵爾守山越輯襄
鄧敵無敢闕其境者爾之智略九淵莫辟故能申威
八鎮所嚮無堅匡論籌謨帝業賴焉是用加爾爵祿
昨以大國其子孫世世守之於戲安不忘危慎終如
始克念多艱式思唯舊岳訓後人永延世祿爾往欽
哉仍賜文綺及帛各六十端濠地若干頃佃若干戶
守墳百五十戶儀仗戶十九家復賜第京師拜征南

將軍討澧州等溪洞平之尋改征西將軍討土番川
藏部間遮掠烏斯入貢使者狀分三道搃其巢窟追
至崑崙山斬馘以萬計鹵馬牛羊十餘萬高帝嘉
其功及還至壽春得疾卒年四十一帝聞訃哭之
慟輟朝三日喪車至三山門親臨奠為視葬地於西
山之原葬費皆官給追封寧河王謚武順子五鎮改
封申國公次銘鏞具指揮次銓次太平奴女秦王妃
永樂間國除加治中錄其孫炳為南錦衣指揮使嘉

靖十年續封定遠侯

石匱書曰以寧河之少年豪舉而能識真主於草昧之際輸誠結納不事徂詐斯已異矣及撫襄鄧八州不激不阿折節下士時人方之羊叔子抑何龍戰之初韎韐跗注之多君子也

石匱書卷第四十三

明蜀人張岱著

湯東甌世家

東甌王湯和者鳳陽東湖里人也長身饒智幼孤育
母姨家時嬉戲跨馬持稍指使群穉及長貧無與比
肩賣豆漿久之作苦歎曰有身如此活於賣漿去之
濠山後見高帝與壯士數人擊劍喜曰此我所矣
領其子弟十餘人歸高帝以從滁陽王為滁陽王

略地常前行和長 帝三歲 帝甥王館和獨委心
推奉 帝威名日著諸將多王部曲顧望未服和恭
謹先受命和所從 高帝立功者取滁和渡江下采
石定太平俘陳桡先和所興諸將分兵立功者舉漂
水拘鎮江躡張士誠於錫山蹂之於長興繫之於姑
蘇拉陳友定於閩中取懷慶收澤潞入晉鏖關襲定
西定東勝宣大和林下灰山和所領諸將自立功者
守常州括江陰克永新招方國珍擣夏明昇斡盜姚

大膽松五開獠始封中山侯最後進封信國公沒追
封東甌王賜謚襄武祠像功臣侑享太廟 高帝中
年倭時時寇浙東海上郡指揮方鳴謙者故國珍從
子 帝以其習海繇之間海事鳴謙對曰倭海上來
則海上備之耳若量地遠近置指揮衛若干戶所陸
聚巡司弓兵水具戰船若壘錯落倭無所入海門入
亦無所得傳岬魚肉之矣 帝曰善於何籍軍對曰
兵興以來軍動民朒民亡所不樂為軍若四民籍一

軍皆樂為軍也和平五開還年已六十餘時天下久
定中山岐陽二王皆物故上亦春秋高不欲諸將
屢典兵和知其意因從容請曰臣老矣不敢稱畫繡
願得歸故鄉為容棺之墟以待骸骨上驚曰卿何
出此言然心喜諸公侯見上喜亦皆次第請上
各賜鈔幣造第鳳陽第皆壯上還謂和卿尚強健
為朕一行海上郡為倭備如方鳴謙所策者而後歸
里和因請與鳴謙偕行至台鳴謙以其客王文啟見

因為和圖上要害城戍處 上一如和請於是設指
揮衛若干戶所於浙東諸郡揀丁壯三萬五千奇城
之和自巡衛城功則盡發散州縣錢及籍犯者家物
工匠往往過所望而城成丁壯多入民家闢其牆根
階序之石及諸碓礮掘諸城下民多賃券者浙人謳
曰京国巨倉公卒聊浪墻除碓礮公城掘礮文啟謂
鳴謙曰浙人譙矣公尚為湯公一言和曰吾聞成遠
笑者不近量任大事者不細謹若以國之無備及於

戈鋌蔓草生竈下蟲豸生井臼安所得碓磑乎復有
讎者老夫將手刃之不踰年衛城成稽軍次定考格
立賞令四民一軍守之東屬登萊成城五十九關中
並海城亦成既報命率其妻胡夫人若子陞辭賜勅
曰天將康民則英才生草野當元之季天欲興朕寔
遣爾和置朕左右伍冒冰霜師突炎暑兩陣未決飢
渴不時合變湏臾以獲生會如此勤勞三十餘年矣
天下大定爾年云邁營爾鄉府挈家言歸嗚呼三十

年於茲視若尋常一旦而歸忽爾款款不能自禁又
同患難致若斯之傷也又勅胡夫人曰惟朕臣和與
滿夫人同朕鄉里夫人勤勞啟家克相立業功成名
遂携眷歸鄉嗚呼昔爾夫嬾黑髮而來今皓首矣相
夫之功啟家之勞朕常有報於是賜和白金二千兩
夫人千黃金三百兩夫人二百鈔萬五千緡夫人五
百文綺四十有副夫人三十是為洪武二十一年其
又明年六公還鄉賜皆等然不及夫人矣和與諸公

侯歲一朝朝亦復有賜其後入朝中風失音車駕幸
視悅歎良久即遣還命其女魚王妃歸寧侍疾疾良
已使其子昂迎至京師安車入內宴賚有加御膳法
酒相屬二十七年復召之鳳陽癰甚令安車入內

上手為撫摩之敍布衣艱難之勞契和不能對稽首
而已上雪涕出藏鏹俾營葬地明年卒年七十親
王遣真育司穿塚治木具明器祥祥賜祭恩禮脩隆
開國功臣蓋惟和最壽而最後死和沉毅不泄勇而

善斷不好兵書臨陣乃決機相勢和得賞賜不入舍
多忠鄉黨父老貧無告者貴極公宰所與故交遺民
意甚懼洽畜媵妾百餘暮年皆資遣之和守常州時
張士誠日遣游士啗以子女玉帛一無所動巡守嚴
密國中事無泄張氏不得其間高帝因得以從容
平漢荆楚間一日醉而詫其部吏曰我今守此而張
氏日來常啗我我政如坐人屋騎危可左右顧也語
間上上隱之和亦自媿和守常再拒破士誠軍所

謂彌錫山蹂長興其大者 上大封功臣始露其前
語曰有酒過竟封中山侯和頓首謝而已明年為征
西將軍與副將軍廖永忠等以舟師自夷陵入峽攻
夏又以不能即取歸不即克夏氏將吳友仁於保安
為 上所誚諫蜀平永忠及傅友德受上賞和予彩
段八而已而責數其逗撓而姑賜之和復頓首謝又
明年和以偏將軍從中山王北討分道擊賊戰斷頭
山敗績 上以和數失利不任將特時令與太師善

長建宮殿麗城郭 上卒用微時綰角交進封信國
公云和有五子少子體積代至左軍都督府同知征
五開道卒其長子昂前天再傳皆病廢不及嗣爵絕
有孫胤績權奇有俠氣正統中以千戶與中書舍人
趙崇使虜父之以裨將守延綏孤山堡虜入寇主將
閉門不出胤勦力疾率麾下百餘人死之和六世孫
紹宗和治中績封靈壁侯正德中浙江巡按御史吳
言和守備寧波城戎精堅倭至今不敢犯請立廟定

海縣春秋祀之制曰可

石匱書曰以湯信公之戰伐其蹟何寥也一逗撓
一不利毗陵酒語至煩廷訓而其後乃爵上公贈真
王駢蕃之錫諸勲舊不敢望焉豈亦以緇角布衣之
契故重耶顯榮令終美哉乞骸一語基之矣夫以絳
侯勃之定策有社稷勲而煩人主詔乃鞅鞅之圖彼
其君臣俱失之矣

又曰余嘗行登萊海上及浙之甬東定海間其父老

歷歷指烽戍云湯信公功不磨滅哉徵信公吾其鯨
鯢食矣嗟乎高皇帝之善器使也